

五松園文稿



五
松
園
文
稿

孫星衍 撰

中華書局

叢書集成初編

五松園文稿

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米 三十二分之一
統一書號：一七〇一八·一五一

此據岱南閣叢書
本排印初編各叢
書僅有此本

五松園文稿卷一

清 孫星衍撰

亥有二首六身解

春秋左傳襄三十年晉絳縣人曰臣生之歲正月甲子朔四百有四十五甲子矣其季於今三之一也史趙曰亥有二首六身下二如身是其日數也士文伯曰然則二萬六千六百有六旬也按史趙言亥有二首者十干配十二支從甲寅數至亥則餘甲子乙丑子與丑實支之首故云二首六甲爲身故云六身下甲子乙丑與甲寅甲辰甲午甲申甲戌同計之方成六甲故云下二如身是其日數言不外二與六也二萬大數在先故曰首六千六百六旬餘數在下故曰身史趙舉二六之數以明之大數在前餘數在後士文伯卽知是二萬六千六百有六旬史趙舉亥以示之支有十二而干十士文伯卽知以旬計矣今杜預注以文字形言之亥字古文竝非二首六身也且亥字不以干支求之所云二首六身安知非二萬六千六百有六日而云旬乎吾友李文學銳推之云二萬六千六百六十日以甲子六十除之得四百四十四甲子又六十分之二十卽三之一也四百四十四外又得二十日故曰四百四十五甲子也其第四百四十五甲子才有二十日故曰其季於今三之一也

祥禪不同月辨

今世三年喪依鄭氏二十七月而除甚合經義惟江南習俗大祥後稱禪既無受服又廢禪祭失禮之甚

者其謬始於王肅而成於宋儒不可不辨。王肅與鄭爲難謂祥禪同月解士虞禮中月而禪爲月中不知鄭氏本西漢諸儒古義按檀弓正義引戴德喪服經除禮云二十五月而大祥二十七月而禫白虎通亦云二十七月而禫然則鄭氏解中月云與大祥同一月自喪至中凡二十七月非臆說矣雜記期之喪十三月而祥十五月而禫爲父在爲母及妻長子也期喪祥禫尚不共月豈三年喪反共月乎禫字從示說文云除服祭也鄭氏注士虞禮云禫祭名也開元禮祥禫祭不同月通典議以二十六月終而禫二十七月終而吉若從王肅祥禫同月則禫祭何所施施於二十五月則奪祥祭施於終禫則奪吉祭是何禮乎沈約宋書禮志永初元年黃門侍郎王準之議云晉初用王肅議祥禫共月遂以爲制江左以來惟晉朝施用搢紳之士猶多遵鄭議宜使朝野一禮詔可是列代俱知王肅之非也孟獻子禫縣而不樂比御不入孔子曰加人一等明禫即可聽樂入內與大祥禮殊異祥禫共月雖用二十七月古禮之文仍從二十五月短喪之實矣宋時朝禮亦略如唐時其誤由於司馬氏作書儀云大祥出就次易禫服注云世俗無受服謂大祥爲除服卽著禫服今從衆據荀爽注云所謂中月者蓋禫祭在祥月之中也歷代多從鄭說今律勅三年之喪皆二十七月不可違也與今本殊紫陽朱氏曰二十五月祥後卽禫當如王肅於是月禫徒月樂之說爲順今從鄭氏之說雖禮宜從厚然未可爲當據此是宋儒私議違鄭從王當時朝制且不行之大祥後自有變除之服見於經典宋儒攷古甚疏不及知耳開傳云禫而纖無所不佩又云素縗麻衣玉藻云縗冠素紩檀弓正義引戴氏喪服變除云白屨無絢經證甚明何爲無受服是則不可謂大祥爲除服亦斷不可從衆宋儒以肅議違經又以私

禮違朝制實不知禮之甚者矣。古者布用麻，有疏密之別。故鄭注秦縗麻衣云：十五升布言漸密於衰麻也。今世有布木縣若依古禮推禪服，當以二十六月設禫祭。以素布衣履易麻衣冠加黑緯以白屨無緣易艸屨。終月後吉祭而除服。庶幾合於經義。又不違國家二十七月終喪之制。學者盍因吾言研覈是非焉。

葬說

今世士大夫惑於陰陽禍福之說尤莫如葬。其貧者久不卜宅。有力者屢遷其棺。妄冀祈福。蔭莊子孫。人心風俗之所繫。故備論之以祛其惑焉。宮宅地形書出於班固蓺文志。其言地形猶管子言山之見榮。非葬也。志又有堪輿金匱十五卷。顏師古引許叔重云：堪、天道、興、地道亦不謂葬。葬書不出於古。則非先王之法言矣。後漢書袁安傳。始載安父訪求葬地。今所傳郭璞葬經者。隨志及璞傳無之。宅經引子夏墓凶宅吉之言。梁劉孝標注世說引青鳥子相冢書大率後人依托。今不存。古人重廟不重葬。葬欲其藏之深。飾終欲其儉。卜地於北郊就陰。此其義也。禮云：生者南鄉。死者北首。是知葬必南向。向南則首北也。又云：祔葬不卜宅。是知葬應祔祖。有地即有穴。但以昭穆爲次。而不擇穴也。又云：死徙無出鄉。是知葬必于國都鄉邑。不能遠求吉地也。此皆經典可以依據。今則反之。信術家無稽之論。一則造爲子午向不可用之說。云當兼天干。甚則或東或西。四維八干皆任其意。不察古人營宅墓皆守北首南向之義。無貴賤皆用子午法天道和陰陽也。傳曰：水晉正而裁室。墮四宿在亥。至子月正位午方。又曰：南門正。南門在巳。至午

月亦正位午方觀經典所命星名爲作室取法虛宿在北宮虛從丘亦爲哭泣之事丘从北一故狐死首丘是爲葬首北取法呂氏春秋云周鼎著鼠令馬履之爲其不陽也鼠子馬午卽兒古者宅墓向明之義余因訪求碑碣細審唐宋以前冢墓無不用子午者明時有閩人鄭善夫移禹陵西向方志以爲不足據今時官廨及元明搢紳宅院亦皆正南向故古者官有世祿其福蔭轉勝於今所以然者陰陽交於子午子月冬至陰極陽生午月夏至陽極陰生天道循環子午則爲絕陰絕陽淮南子及孝經緯云斗指壬小雪指子冬至指癸小寒指丙芒種指午夏至指丁小暑今用壬丙癸丁代子午皆寒暑陰陽不能相生之節用之冀宅墓縣長獲福是背天道而馳也子午不可用之說出自何書問之術士亦不能言其根據或云西人爲此言移其國位在午尤可惡也且生則悅陽死則悅陰物之情也死者首北所以安魂魄病者東首受生氣也今舉死者首東首南反其道矣何以獲福此術者之惑也一則誤用前朱雀後元武左青龍右白虎之說東方木色青故曰青龍西方金色白故曰白虎朱雀元武之名亦依方色而立今不論東西南北徒以左右前後名之若北向則木爲白虎金爲青龍名不正則言不順且與天象違異尤顯然者察其致誤之由因讀禮記云前朱雀而後元武左青龍而右白虎不知四者行軍之旗幟故可左可右下云招搖在上亦謂畫北斗於幡也且爲上有行字言之行法天動止法地靜命之曰行知止則反是今地道靜而不移奈何以軍行視之不善讀書違背天道甚矣復有信先天卦位之說移易方位謂後天之坎離卽先天之乾坤者先天卦位出於陳搏僞造近世諸端駁之無遺義更不可信八卦列於八方按十二月此孔子之言若乾南

坤北則坎離艮震巽不當盡列於東方乎錯亂五行又術者之惑也一則造爲無氣無穴之說古者公墓之地掌於冢人國民族葬掌於墓大夫皆有其族有私地域豈能遠擇吉地太公五世反葬晉臣葬於九原依國族也世俗徒見孔子歷世封公卽謂曲阜非孔子不能葬非子夏不能葬孔子於此試問孔子魯人也若齊若晉有聖人葬地能卜葬於他國乎他國有聖如孔子者能來葬於曲阜乎且唐宋以來孔子之後皆昭穆祔葬而傳爵不絕所祔之穴皆有氣乎今世家所擇有氣有穴不遠數百里而葬之地一再傳而名位歇絶又何故此又術者之惑也一則造爲三元甲子有衰旺近時宜用乾兌向之說夫三元生於甲子則年月日時皆有三元一日一時亦有旺氣何獨取之於年坎離天地正位古今不易六韜言凡攻城圍邑城之氣出而北城可克城之氣出而西城可降城之氣出而南城不可拔城之氣出而東城不可攻是古者依天道立向貴陽賤陰之驗若依三元旺氣宮殿官署數十年一易向有是理乎列代官署南向縱居之者吉凶不定而官署自存自旺未嘗有退氣之時也卽以人事卜之今有葬地兌向坐空朝滿合術士法者吾見已敗矣此又術者之惑也窀穸之事欲其高燥安燠則子孫心安地道難知陵遷谷變古者但卜之而已土中夏清勝於停棺經暑有速朽之患仁人孝子念之是以速葬爲急古者限以踰月之制大夫以上不能倉卒備禮又有賻贈會葬之文不得已而至三月五月非以緩葬爲貴也今世人不明此義直以吉凶係於宅墓夫宅墓人命吉凶皆以干支而定葬可轉移禍福將并所受于干支而更換之乎卽云葬吉始得賢子孫彼術者何不自謀而爲人役乎乾爲積善坤爲積惡故孔子言積善餘慶積

不善餘殃作善不獲報未能積也今不積善而欲求福於宅墓即得吉地保無水火盜賊之患乎蘇化熊而入羽淵王季葬於渴山而水噉其墓至子孫且勃興積德累仁所致非葬之善也近世儒士無通曉古書之人不肖者或預置荷應於穴中私約地主取重值必詭言人家祖墓不吉乃可售己地又詭言子午向不可用或兼天干或用四維始可令葬者聽其指畫其初由於欺人其後有著之於書者并以自欺東南士大夫久厝不葬傾竭家貲之患實由此鑿古者未葬不除喪今國家亦有停棺不葬之律安得以禮經責之功令禁之俾復三月踰月之制又密訪所稱地師者治以詐欺取財之律則澤及枯骨之陰德遠矣

孫忠愍侯祠堂藏書記

家大人少孤貧好聚書書買幅湊易衣物購之積數櫃旋以饑驅北行予生四五齡時既就傅歸竊視櫃中書心好之年逾志學從家大人之句曲官舍因按日讀所列學宮十三經注疏及諸史朱墨點勘凡數過幾廢科舉之業已而負笈遊學院江淮海河洛之間踰二嶠而西著述於關中節署畢督部藏書甲海內資給予使得竟其學嘗應試入都備書四庫館所見書益宏多又數年釋褐入玉堂奉勅進西苑校中祕書竝覩翰林院所存永樂大典回翔省覽者九年所交士大夫皆當代好學名儒海內奇文秘籍或鈔或購盡在予處閒覽釋道兩藏有最先古本足證舊書及陰陽術數家言取其不詭於經者寫存書目及官東魯由監司權廉使往來曹南歷下防河折獄所頓亭傳不廢披覽旋以母憂南旋倉皇相載倦峩狼

籍時值河溢經南陽湖遇風沈舟歸至金陵料簡殘冊置忠愍侯祠屋中損書大半比年負米吳越貧不自存猶時時購補數十種書稍完具如初或有創獲蓋藏書之難而好書之不能免於尾者尙如是所藏既不備羣書不能區分四部獨釋其最要者以教課宗族子弟略具各家之學導來者先路俾循序誦習咸有法程分部十二以應歲周之數曰經學第一先以古義附以雜說漢魏人說經出於七十子謂之師傳亦曰家法唐人疏義守之不失以及近代仿王氏應麟輯錄古注皆遺經佚說之僅存者學有淵原謂之古義至宋明近代說經之書各參贊見不合訓詁多其游辭少有要實或又疑經非議周漢先儒謂之雜說列於附存曰小學第二先以字書次及韻書訓詁之學不明則說經不能通貫或且望文生義文字之變隸楷遞改滋生日多旣集漢魏字書亦及後世以盡其變聲音反切雖起六朝或推本讀若舊音而作且引古字書亦宜兼載曰諸子第三先以古書附以僞本九流七略互有改移班書隋志部分最當依此爲類庶非臆見六韜舊入於儒管子還列於道周秦述作之才幾於聖哲或多古韻古字僞書後出了然可知唐宋諸子尤多遊戲之作附存於末不惑後人曰天文第四先以垂象次以算學次以陰陽黃帝、巫咸、甘石之學是分天部分野以占吉凶出於保章、左史其書最古謂之垂象九章、五曹之書惟知轉算不必長於觀象謂之算法遯甲六壬其術亦古不可中廢合以命書算法謂之陰陽三者俱屬天文其學各有所受不能合一曰地里第五先以統志次以分志或總紀區宇或各志封域禹貢古文說及周地圖之言存於列代地志及水經注括地志諸書宋元方志多引古說證經注史得所依據宜存舊書地名更

易今古殊日兼載今志以資博考曰醫律第六先以醫學次以律學醫律二學代有傳書竝設博士生人殺人所關甚重經稱十全爲上醫不三世不服其藥史稱郭鎮陳龍世傳法律此學古書未火於秦歷代流傳尤不可絕贅則刪其後出偏見者律則今代損益盡善欲求根據兼載古時令甲云曰史學第七先以正史次以雜史次以政書古今成敗得失一張一弛施之於政賴有典型存乎正史史臣爲國曲諱或有抵牾尤賴雜史以廣異聞朝章國典著作淵藪舉而措之若指諸掌則政書尤要云曰金石第八金石之學始自宋代其書日增遂成一家之學鐘鼎碑刻近代出土彌多足攷山川有裨史事古今兼列無所刪除曰類書第九先以事類次以譜類次以書目古書亡佚獨賴唐宋人編類採存十五非獨猶祭詞章實則羽儀經史謂之事類譜學之傳自東晉板蕩南宋播遷周秦世系不可復尋或多僞託唐宋學有專家傳書幸在列代經籍自有淵原證以書目所存僞本不能妄託是亦事類之屬故并爲一曰詞賦第十先以總集次以別集漢魏六朝唐人之文足資考古多有舊章美惡兼存自宋以下人自爲集取其優者入於書目餘則略之曰書畫第十一先以總譜次以分譜六朝以來以行楷爭奇存乎絹素或摹繪山川故事以傳往游書畫小技不絕於今宜考其真贗遺賞之學所謂寶於博奕游藝及之勿致廢棄曰小說第十二稗官野史其傳有自宋以前所載皆有本末或寓難言之隱或注所出之書今則矯謬鬼神憑虛臆造竝失虞初志怪之意擇而取之餘同自錄焉昔之聚書者或贈知音或遭火患或以破家散失或爲子孫售賣高明所在鬼神瞰之予故置之家祠不爲已有旣經沈澁僅有文字可尋卷帙零亂知免天災

豪奪之筆。但捨之作宦。不能多攜。是所缺望。略述原流。以曉後人云耳。

古佛象記

曩古石佛象于闕下爲齊天保時所刻。又得于兗州。爲唐先天時所刻。又得宋刻畫象于終南山。便子谷。又得烏斯藏古銅象。則楊方伯揆所贈也。以是前代物。故愛玩之置于家。先母好善。又守婦人無外事之義。聞釋氏不害于物。乃敬事之。日誦經禮拜。及遘疾。敬之愈至。疾益劇。不起。吾仲弟哀吾母之事佛無効也。此毀其忠。予止之曰。禮父母所愛亦愛之。又曰。思其嗜好。禍福定于天。佛不能爲福。卽不能爲禍也。世之持誦釋氏書者。徒以心有所歸。輕功名。減嗜欲。如吾儒之讀書稽古。不使外物役心耳。佛固不知佛之道。卽孟子所云仁心仁聞。不行先王之政。不可法于後世之道。亦異于殘殺者。而何必毀之。且夫秦之權。銷雀之瓦。豈尤盜跖之家。後人愛之。飾爲古迹。爲其難得也。火浣之布。非可禦寒。夜光之珠。不及廷燎。直以爲賞心之具。今置古佛象于堂室。比之法書名畫。所謂小道可觀矣。何必毀之。仲弟曰。吾聞父報讎則子行劫。存此象以惑子孫。將有佞佛而入于邪。或耽虛無而廢事者。柰何。吾見世之愛土購書者。其後且有達人。世之悖出者。其後且悖出。世之逞才藝爲詞曲小說者。其後且入于流蕩淫僻氣之所感。如流溼就燥。甚可畏也。遠則楚王英。最先事佛。而不終其身。近則秦觀。以寫佛書削秩。鄭鄧以符錄降仙作書。爲溫體仁附致其罪。人陽也。而接于陰鬼氣中。之家爲不寧。性爲不正。招禍之道矣。是以惡其流弊也。予無以折之。亦不忍弃故物焉。遂記其事。以訓于家。

孫氏先塋連理木記

嘉慶四年太歲己未仲春月晦，星衍歸自金陵，展墓鄉郡至毘陵西郊夾港口，謁十一世祖明贈漢中府知府諱鑑公墓，披荆周覽，得異木焉。生當神道，團團如蓋，兩樹竝立，上枝連理，急告族人曰：此圖籍所稱木連理也。時始異之，野人聚觀，以爲嘉瑞。府君者，明故行山西太僕卿諱鑑之父，禮部尚書文介公諱慎行之曾祖也。或曰：府君之後，對策及第者二人，入詞館者四人，成進士任庶司者代有數人，皆清白報國，無田宅贍子孫，然歷兩朝，未嘗有罹國法，謗名節者。聚族同居，且十數世，是木也。生其孫氏，睦族餘慶之徵。與星衍曰：不然。此國瑞也。聞諸沈約志言：王者德澤純洽，八方合爲一，則木連理生。終軍對奇木言：衆枝內附，示無外也。國家重熙累洽，拓地數萬里，山陬海澨，必有神木生之。吾不及知，其在孫氏先塋，是吾族食德服疇，世受國恩，行革勿傷之化所沾被也。且五行亥卯未木也，是木久拱矣，而顯在未歲月建卯也。於文未象木，重枝葉位在西南，其應西南陲之民有慕化歸誠者焉。儒者不妄言符瑞，而洪範推天人休咎，嘉禾來牟，見於舊詩，不可誣也。星衍職任舊史，事應經典，敢不紀述，以示後世，且使子孫世世報國恩而思先澤，庶幾毋翦斯木云。

許叔重本主結銜議

撫浙使者阮芸臺先生既設詁經精舍，以教生徒，星衍請崇祀先師許叔重、鄭康成於堂中，與臧文學鏞、堂舍生洪茂才頤煊、震煊議所以書木主銜者，咸君以謂許君之子沖上書，稱太尉南閣祭酒，比范史稱

汝長爲得其實。范史不載。明已疏也。汝長官卑。不宜以此。蓋太尉祭酒。星衍以謂太尉官屬雖貴。由其自辟除。不及汝長之列朝籍。鄭康成注禮。稱邑宰爲賈臣。汝長宜書。兼列太尉祭酒。如今人之書前官可也。且許沖上書。祇言其父病。未必病篤不起。或後爲汝長。范史則據終後而言。較可從。洪兩生以謂百官志。太尉官屬有黃閣。句主簿錄省衆事。其官以令史爲之。令史舊注百石。不及令長之秩。多至千石。最小亦三百石。是汝長尊於太尉官屬。周澤傳。建武末辟大司馬府署議曹祭酒數月。徵試博士。中元元年遷鼈池令。令長一也。許君由孝廉辟太尉南閣祭酒。由祭酒遷汝長。故本傳云再遷除汝長。與周澤傳官階正符合。胡廣祭酒皆一位之元長。不必定屬尊官。今主題汝長。不及太尉祭酒可也。先生曰。洪兩生議是可兼題之。如孫君議。

與秦觀察灑書

竊見閣下爲政之意。欲異乎俗吏之爲也。今監司奉命有專達之責。顧一方之弊政重且大者。非一人一時所能更。不能更而言之。以招執政者之忌。卒無益於事。僕官山左。屢以曹單河工。應有童隄格隄。請於當道。領之。託言無經費而不行。此其弗事矣。浙之士夫不冐速葬。閣下所應酌限陳奏。以革其俗也。浙之多權厝也。積棺湖干。反以速葬者爲忍其親。其厝之而子孫有發迹者。愈以爲得地而不葬。或子孫之貧而絕者。又不能葬。是始終不葬其親也。聞且棄棺於道。斲爲船板矣。或曰。宋時南渡士夫。攢厝其親棺。以待北歸。今居於此者。何爲倪其習哉。此非示諭勸誨之所可禁也。又不可持之太急。以苦貧民也。按古有

未葬不除喪之禮今三月踰月之制縱不能行閣下陳請有終喪不葬其親者官員不準起官士子不準應試商賈平民不準離鄉貿易三年之久富者既葬可依期貧者亦無難舉事其已終喪而未葬事在令前者再請限以一年則部議不至以不便民相格因浙江省以推及於天下此政一行所謂澤及枯骨也今之言事者動言擇其重者大者陳之乃有濟耳此近名也夫重且大者既不易更可更者又以爲不足言是終無益於事也人之身有奇疥焉有痼疾焉以奇疥求治於醫醫者曰吾欲得痼疾而治之豈情也哉或曰浙中權厝者多火生枯木其應多火災或曰積屍之氣經暑中人則爲疫丙吉見喘牛而問之此亦調燮陰陽之一端廉卓所宜問也

貞節堂敍

吳之楓橋西岸有貞節堂前閣學翁鴻臚爲旌表節孝故奉直大夫袁君室韓孺人所署名也堂外闢闢而內爽坦旁則引泉種樹左爲竹柏樓後爲五硯樓皆節母獨居課子及子又愷藏書讀書之地堂三間不崇不隘無磨礲雕績之巧不佞與又愷相識晚恨不及升堂拜母也又愷涕泣言母廿五而守節撫孤越十五年而歿方四十時爲乾隆之四十六年子婦等用時俗禮爲母以生日舉壽觴母舉古稱未亡人義卻勿御未幾母竟卒又愷痛母益甚偏乞當世賢士夫爲文以顯母節行彙一帙命曰霜哺遺音不佞時亦有母喪聞其言不自知其淚涔涔不止也孝經稱揚名於後世以顯父母不謂今之名位世之以科名官位達者不過奉告身張燕會以爲親歡誇耀閭里愚婦孺甚則忘身以及其親數典而忘其祖若是

者一郡邑率有數人。其身榮。其後無聞焉。今節母卻壽觴不欲自顯。卒得旌於朝。又愷不汲汲求仕。進以立身。能文章名於世。又推其孝思以及其祖。藏弃先世書硯之屬。以爲宗器。使天下之士皆欲登其堂。觀其先澤。爲文以顯母之節行。若是賢子孫。海內千不得一焉。誠有合於孝經所云立身行道者。宜不以綠野畫錦之堂之易斯堂也。

湖北金石詩序

吾友嚴子進搜攷湖北金石。自隋至元。凡若干種。爲之題詠。登臨之勝。與廢之感。讀之使人不勝情。夫詩固異於跋尾。子進此作。流連風景。抒寫性靈。可謂得風人之旨者矣。始畢督部鎮楚方檄。訪各路金石拓本。一上內廷三通館。一以副本爲之攷證。如歐、趙所撰書。任其事者。子進與馬通守紹基也。子進旣以此詩上督部。契賞其清雅。屬爲開雕。以備一方文獻。旣而督部奄逝。楚中多故。金石書卒以不成。此邦金鐘鐵鑄。豐碑古碣。獨賴子進詩以傳一二。亦可慨已。予始與子進尊甫侍讀君及張舍人墳、錢刺史坫依畢中丞於關中節署。訪求古剏。中丞手著關中金石記。刊行於世。其後移節中州。又成金石書。如在關中時。子進亦省謁尊甫。作入洛之遊。一時翹材之館。風流文物。甲於海內。已而予官京師。侍讀捐館舍。諸同人亦多星散。中丞往來節制齊楚。不獨舊遊不可復預。著述之事。亦漸零落。及子進來東。訪予於濟上。巡使署。越十餘年。懷人傷逝。益不勝慨焉。然阮侍郎旣刻山左金石書。以成督部之志。子進能讀父書。又以此詩存楚遊。訪古梗概。督部生平好古愛士之心。亦可大慰於九京矣。子進所著有江寧金石記。又爲予校